

Brisbane

Nachdem mir mit em Auto gad no so knapp, bi dä Familie Bickel aachoo sind (isch scho chli frustrierend gsi, da mir ja vo Cairns bis Brisbane kei Problem gha händ, oder fascht kei), händ mir gad z'erscht en Schwumm bi ihnä im Pool chöne mache. Obwohl sie mich ja nonig kennt händ, bin i sehr herzlich und Familiär empfangen worde und i ha därfe bi ihne schlafe und z'ässe isch so super fein gsi. Am 2. Tag häts Äpler Maccarone gäh und nach 4 Monet isch das es träumli gsii!:) D'Corina und i händ am 2. Tag dänn d'Stadt unischer gamcht und sind chli go shoppe! Obwohl bsunders viel han i ja nid chöne, dahs i mim Rucksack so ziemli kei platz meh hät! Am 3. Tag hät üs d'Selina (Tochter vo dä Family) in Koala Zoo bracht! Das isch so härzig gsii, s'hät uh viel Koalas, Kangaroo's und veili anderi Tier gha. Mer hät is Kangaroo - ghäg inechöne und füetere und streichle! Am Schluss händ mir no es Föteli mit mä koala gmacht, sind so härzigi Tier. So völlig verpennt und so richtig fuu! ☺ am nächschte Tag isch's für mi wiiter nach Byron Bay gange.

Byron Bay

Mis Back Packers isch direkt am Strand gsii, 1 min zum laufe und am Strand han i soviel Platz gha. Er isch super lang gsii und es hät fascht kei Lüüt gha. S'Städtli selbe isch vor allem us einere Strass bestande, wo's ganz viel Shops und Reisebüro's gha hät, aber kei Hochhäuser und das han i so richtig gnosse. Suscht han i nid würkli viel gmacht, bi eifach chli gsii und han's gnosse.

Sydney

Nachere lange Busfahrt, bin i frühe am morge in Sydney aacho und ha det Corina wieder troffe. Mir händ zämä zmörgelet und i bi nachher d'Stadt chli go aaluege. Bi denn na die ganz Strass zum Groular Quay gloffe, wommer dä Schiffshafe, d'Harbour Bridge und s'Opere Hous gseht. Im Hafe isch gad no es riise Krüzfahrtsschiff gsii und das hät mi völlig beidruckt. Bi denn lang eifacht chli döt gs'ässe und ha dä uusblick uf d'Harbour und s'Opere Huus gnosse! Am 5i zurgg zum Back Packers, da i am abig dä Nils troffe ha. Bi scho chli nervös gsii, will ha ja scho länger niemer meh vo dihei gseh! ☺ Doch zuefall git's, wo i mi uf dä weg zum Openair Kino gmacht ha, han i no dä Pascal vo Rorbass troffe. Also d'Welt isch ja mengmal scho chlii! ☺ Bim Openairkino hät dä Nils scho uf mi gwartet, er schafft ja det und hät mir alles chöne erkläre! Isch scho iidrücklich gsii, und die Liniwand hät mich völlig beidruckt. Bi ja no nie i so mä grosse Openair Kino gsii! Leider isch dä Film sehr komisch gsii und mir händ denn zu de Bar gwechslet!

Am nächschte Tag, nachdem i unfallfrei all mini Kleider gwäsche han, sind dä Nils, Corina und i, is Aquarium vo Sydney. S'hät riisigi Aquarie gha, und i 2nä hät mer i so Röhre chöne dure laufe und d'Haie usw. sind obe und uf dä Siite vo eim dure gschwumme. Nachher sind mir mit dä Hochbahn, no 2mal dur d'City gefahre und im Hardrock en Drink go näh!

Am Abig sind mir go Indisch ässä, mir händ gschwätzt und gschwätzt, das mir fängs am halbi 11i usem Resti sind. S'Esse isch super fein gsii, aber irgenwie hät min Mage das nid vertreit und bim Kino aachoo, han i d'WCschüssle gnau under d'Lupe gnoh. Später sind mir, mit em Nils sine Mitbewohner no eis go trinke!

Am letschte Tag, händ's mi mit Sack und Pack abholt und mir sind no i Coggee go schnorchle. Aber i, wo so en gfröhrli bin, ha's nid lang im Wasser uusghalte! 😊 Nach mä chline z'mittag (uussaag vom Nils), sind mir döt härä vo er wohnt und händ mit em Mike Krocket glueget. Das gheisst, er hät glueget und dä Nils hät müesse mitdrinke (nach Krocket- trinkregle) 😊! Am Abig bin i wieder uf dä Bus, 12h fahrt nach Melbourne, sniff! 😊 Aber de Nils flügt en Tag später au abe, also treffed mir üs nomal.